

Матфеин 8 бөлг.

1. Иисус уулас дорагшан буухла, дала эмтн Терүг дахв.
2. Терүнүр хальдвр гемтэ күн өөрдэд, сөгдж келв: «Зерг! Дурн бээхлэ, намаг цеврлж чаджанаач».
3. Иисус харан сунһад, эрэ терүг көндөһэд келв: «Цевр бол», - гемтэ күн даруны тер гемэсн цеврлгдв.
4. Иисус терүнд келв: «Күүнд бичэ кел, бийэн Бурхна ах эрүн күүнд үзүл, Моисеин өгсн закварар бэрцинь авч од, тер теднд герчлһ болх».
5. Иисус Капернаумд ирхлэ, Терүнүр цергин толһач өөрдэд келв:
6. «Зерг! Мини зарц тэкрсн цогцта гертэн кевтнэ, йир икэр зовжана.»
7. Иисус терүнд келв: «Би ирэд, терүг эдгэнэв».
8. Цергин ахлач хэрү өгв: «Зерг! Таниг эврэннь герт орулх, би нертэ – төртэ күн бишв, зуг нег үг келхлэтн, мини зарц эдгж одх.
9. Яһад гихлэ, би йосар бээдг күмб, болв мини заквр авдг цергчнр бээнэ. Негнднь «Йов» гихлэ – тер йовна. Талданд келнэв: «Нааран йов» - тер ирнэ. Зарцдан келнэв: «Энүг ке» - кенэ.»
10. Келсиг соңсчкад, Иисус алң болһад, ардаснь йовсн улст келв: «Үнэр келж бээнэв: Израильд тиим иткл олж чадсн угав.
11. Таднд келжэнэв, дала эмтн зүн үзгэс болн барун үзгэс ирэд, Авраамин, Исаакин, Иаковин өөр Бурхна орн-нутгт суух.
12. Бурхна Теңгрин Хаана нутгт бээсн көвүд көөгдэд тамд хайгдх. Тендэс уульһн болн шүдин тачкнлһн соңсгдх.»
13. Иисус цергин ахлачд келв: «Йов, чини итклэр чамд болх». Тер цагла түүнэ зарц эдгв.

14. Иисус Пётрин герт орхла, халута кевтсн хадм экинъ бээснь үзж.
15. Иисус терүнэ харт, Эврэннь харан эрэ күргхлэ – халунь уурч одв. Гергн босад хотан болһв.
16. Асхн ирхлэ, Иисусур олн шулмсд авлгдсн эмтиг көтлэд авч ирв. Тер үгэрн шулмсиг көөһэд харһв, гемтэ улсиг эдгэв.
17. Исаин келсэр болтха гиһэд: «Эн бийдэн мана гем авад йовв».
18. Иисус өөрэн дала эмт үзчкэд, заквр сурһульчнртан өгв – талдан үзгүр усчх.
19. Нег Бурхна Зака меддг күн Иисус тал өөрдэд келв: «Багш! Хамаран та одв чигн, би Таниг дахнав.»
20. Иисус терүнд келв: «Аратд нүкн бээнэ, теңгрин шовудт үр бээнэ, Күмни Көвүнд толһаһан тэвдг орм уга.»
21. Талдан сурһульчнь Терүнд келв: «Зерг! Нанд зөвшэлэн өгтн, эцкэн оршахар седжэнэв.»
22. Болв Иисус терүнд келв: «Намаг дахад йов, үксн эмтн үксэн оршатха».
23. Иисус оңһцд орсна хөөн, сурһульчнр ардаснь орцхав.
24. Теңгст һалв салькн үлэв, усн дольглад оңһциг дүүргв, болв Иисус серсн уга.
25. Тиигхлэ Терүнэ сурһульчнр Терүн тал өөрдэд, Терүг серүлэд келв: «Зерг! Мадниг харсч ав!»
26. Иисус теднд келв: «Яһад тадн ээжэхмт, баһ итклтэ эмтн?». Хөөнь Эн босад, салькн теңгс хойриг зогсав. Тагчг болв.
27. Эмтн алң болад келцхэв: «Эн кемб, салькн чигн, теңгс чигн Энүнэ үлмэд орна.»
28. Иисус талдан көвэд Гергесинск һазрт ирхлэ, тенд шулмсар авлгдсн хойр күн оршалһна яршгас һарцхав. Тедн йир догшн билэ, эмтн тер хаалһар йовхдан ээдг

билэ.

29. Шулмс хээрцхэв: «Маднд юмб, Иисус, Бурхна көвүн? Та нааран эрт ирэд, мадниг зовахар бээнэт?»

30. Эднэс хол һазрт дала һахас хот хээж йовла.

31. Шулмс Терүг сурцхав: «Мадниг көөхөр бээхлэ, һахас тал йовул.»

32. Иисус эднд келв: «Йовтн.» Тедн һарчкад, һахас дотр орцхав. Сүрг һахас холын эрг деерэс тенгст орад үкж одцхав.

33. Малчнр балһснур гүүһэд, тенд юн болсинь , шулмсудин тускар келж өгцхэв.

34. Тиигхлэ цуг балһснд бээдг эмтн Иисусин өмн һарв. Терүг үзчкэд, эднэ һазрас Терүг һархинь сурцхав.

